

2 Pedro

¹ Høøch xøhajt Simón Pedro. Høøch hädaa nocy njahby. Ja'a Jesucristøch nmøødtuumby. Jaayá'ayhøch tøø xwiinguexy coöchä miädia'agy nyajwá'xät. Tøø mijtsä Jesucristo xyajnähdijy coo hajxy hoy mmäbøgät jaduñ mäwiin neby højts xyajnähdijjän. Tu'cuhdujt hajxy jaduñ xquiumáayyäm nägøxiä je'eguiøxpä coo hajxy tu'cuhdujt nmäbøjcäm coo tiøyyä. Jaduñ yajnajuo'øy coo Jesucristo yhojiäya'ayä. Jaaya'ay hajxy nDioshajtäm. Tøø hajxy xpiädaacäm hawa'adstuum.

² Ween mijtsä Dios ja'a hoyhajtä weenhajt xmio'oy mõj may coo ja'a tøyhajt hajxy mmøødä ja'a Diosøxpä møødä Jesucristocøxpä, ja'a hajxy nWiindsønähajtämbä.

³ Coo ja'a tøyhajt hajxy nmøødhajtäm ja'a Jesucristocøxpä, paadiä Dios hajxy madiu'u xpiuhbéjtäm ja'a miäjaahaam, jaduñ hajxy hoy njäya'ayhajtämät. Mänitä Dios hajxy jaduñ xquiumáayyämät. Jaanä miäjaahaamä Dios hajxy xyagjyhadäänäm homiänaajä neby je'e jiugyhatiän. Coo Jesucristo miøjjä jiaančhä, coo jiaanč tehñ yhojiäya'ayä, paady hajxy tøø xyajnähdijäm coo hajxy hoy njäya'ayhajtämbät.

⁴ Coo Jesucristo jaduñ miøjjä jiaančhä, paadiä mayhajt mõj may tiuna'añ maa højtscøxphajtäm. Jaduñ jim myiñ cujaay maa Diosmädia'aguiän coogä Dios mayhajt may tiuna'añ maa højtscøxphajtäm. Homiänaajä

hajxy xyagjygyhadáanäm neby je'e jiugyhatiän. Y tøø hojiootä howyiinmahñdy hajxy xmióoyyäm hawiinjemybiä. Jadhun hajxy hoy nmøødhjätämät tu'ugmädia'agy. Jadhunä haxøøgpä hajxy yaa hoy njøjyohdiúutämät hädaa yaabä naaxwiin. Ja'a häna'c-hajxy yaa ca'a mabøjpä, hadsojwiinmahñdy hajxy miøød. Coø yhaxøøgwiiinmahñdy hajxy jadhun quia'a najtshixø'øwa'añ, paady hajxy jiiby quia'awa'añ haxøøgtuum.

5-7 Paadiä Diosmädia'agy hajxy tsøc mabøjcäm. Tsøc hajxy hojiäya'ayhajtäm hamuumdu'joot. Tsøc hajxy jaac habøjcäm ja'a Dioscøxpä. Tsøc hajxy hjtäm najuø'øyaamby. Tsøc hajxy mee'xtújcäm. Tsøgä Dios hajxy wiingudsähgøøyyäm. Tsøc hajxy nichójcäm nebiä tu'ugpuhya'ayän, neby højtsä Jesucristo xchójcäm. Tsøgä jäya'ay hajxy nägøxiä tsojc méé'xäm, hoy hajxy näje'e quia'a jagä mabøcy.

8 Coø hajxy jadhun hamuumdu'joot ngudiúunämät nébiøch naamnä tøø nmädia'agy, mänit hajxy nhoyøøyyämät. Mänitä Jesucristo tiuung hoy ndúunämät. Nmøødhjätämä tøyhajt hajxy jadhun ja'a Jesucristocøxpä.

9 Hix, pønjaty jadhun ca'a cudiumb nébiøch naamnä tøø nmädia'agy, jadhun mäwínäts hajxy je'e nebiä wiinds nebiä xoodspän je'eguiøxpä coø hajxy tøø jiahdiägoy coø piojpä quiädieey hajxy tøø ñähwa'açhii neby hajxy hijty jegyhajty jiäya'ayhatiän. Jadhun hajxy tøø jiahdiägoobiä coø Dios jioot chocy coø hajxy hoy jiäya'ayhädät. Paady hajxy jadhun jia yajnähwaatsä.

10 Hoorä, mägu'ughajpädøjc, tsøc hajxy hamuumdu'joot cudiuunäm nébiøch naamnä tøø nmädia'agy. Jaduhñ yajnajuø'øwa'añ coo Dios hajxy tøø xyajnähdíjjäm coo hajxy xquiu'ughadáanäm. Coo hajxy jaduhñ ngudiuunämät, cab hajxy jaduhñ mänaa ndu'udägóoyämät.

11 Jaduhñ hajxy hoy yajxón nnócxämät Jesucristo wyiinduum maa cøjxta'axiøø yhane'emiän. Jaaya'ay hajxy nWiindsøn_hájtäm. Tøø hajxy jaduhñ xyajnähwáatsäm.

12 Homiänájäts mijts jaduhñ nyagjahmiejtsta'aga'añ nébiøch naamnä tøø nmädia'aguiän. Tøyhájthøch jaduhñ tøø nmädia'agy. Hoy hajxy jaduhñ mjaty. Cab hajxy mdsoj jahdiägoyya'añ.

13 Hawiinmats jaduhñ cooçh mijts jaduhñ nyagjahmiejtstá'agät tehñgajnä, mädúhñtiøch njaac juggyhaty.

14 Hamdsóojøchä Jesucristo xñämaayy cóogøch mobädajpä nho'ogaannä, ja'a hajxy nWiindsøn_hájtämbä.

15 Pero cooçh hñajty tøø nho'ogy, hoy hajxy jaduhñ mjaac capxtá'agät nébiøch cham nmädia'aguiän. Jaduhñ hajxy hoy mjahmiejtstá'agät.

16 Tøø højts mijts nyajwiingapxø'øyc coo Jesucristo møcmäjaa miøødä, y coo yaa jadähooc quiädaactägatsa'añ hädaa yaabä naaxwiin. Tøyhajt højts jaduhñ nmädiaacy. Cab højts hamdsoo nyajcojy. Diosmädia'agy hädaa jaduhñ. Ca'a ñä'ä cueentä nebiä jäya'ay cueentä hajxy yajcojjiän. Hamdsoo højtsä Jesucristo nhijxy coo møcmäjaa

miøødä, coo je'e Dyiosä.

17-18 Mänaa højtsä Jesucristo hänäjty jim nmøødän maa tunän, mänitä Diosteedy jim quiuhgapxnajxy tsajpootyp: “Høøch nhamdsoo Huung yø'ø. Njaanč tehṁ chójpiøch yø'ø. Jaanč tehṁ jiootcújc-høch nnijwiø'øwyii maach nHuungcøxpän”, nømä Jesucristo ñänøømä. Njaanč mädoow højts jaduhṁ. Møcmäjaahaamä Dios jaduhṁ quiapxy. Jaanč tehṁ yajxonä Jesucristo piädaacä ja'a Tiéediäm, nebiä hajajpän. Paady højts yø'ø tun nyajxøøbejty: “Ja'a tun maa Dios ñägapxiän coogä Jesucristo yHuunghaty.”

19 Tøyhajt jaduhṁ jiaanč jajty nébiøch cham nmädia'aguiän. Hamdsoo højts nhijxy nmädooyy. Hahixøøby jaduhṁ coo højts mijts nmädia'agy xmiäbøjcät. Maas hahixøøby jaduhṁ coo Diosmädia'agy hajxy mmäbøjpät, ja'a jäya'ayhajxy jecy quiujáhyyäbä. Jaduhṁ mäwíinädsä Diosmädia'agy miäbaady nebiä jøøn tioyyän hagogdstuum. Hix, xyajwiinjuøøyyäm hajxy jaduhṁ tijaty hajxy hoy hamdsoo nga'a wiinjuø'øwáanäm. Hahixøøby jaduhṁ coo hajxy homiänaajä nyajcopcøøyyämät. Coo Jesucristo yaa quiädaactägátsät hädaa yaabä naaxwiin, mänit hajxy cøxiä xyajwiinmädiaagø'øwáanäm. Jaduhṁ hajxy hoy nwiinjuø'øwáanäm cøxiä.

20-21 Huuc wiinjuø'øw hajxy jaduhṁ, coo jäya'ayä Diosmädia'agy hajxy jecy quiujahy, cab hajxy hamdsoo yajcojy. Näje'e hajxy jaduhṁ quiujahy tijaty hänäjty jadáanäp tunáanäp. Ja'a Dios je'e najtscapxøøyy ja'a yhEspírituham waamb hajxy quiujáayät.

2

1 Jii jäya'ayhajxy hijty näje'e jegyhajty miäna'añ cooc tyijy Dios hajxy hänajty ñajtsapxóøyyäbä. Pero hõhndaacp hajxy hänajty jaduñ. Ja'a Dioscu'ug hajxy hänajty jia wi'i wyiinhøønaamby. Jaanä jaduñä hõhndaacpähajxy jiiby wiäditaambä maa mgajpthajxiän. Cabä cu'ug ñajuø'øwa'añ pø wiinhõhñäp hajxy hänajty jaduñ. Høxtä mäna'anaambä hõhndaacpähajxy jaduñ cooc tyijy ja'a Jesucristo hajxy tøø xquia'a nähho'túutäm. Paquiä hajxy yajcumädowa'añii. Pønjatiä hõhnda'agymiädia'agy mæbøgaamb, tu'udägoyyaamb hajxy jaduñ. Ja'a häna'c-hajxy jaduñ hõhndaacpä, niyhamigähadäänäp hajxy jaduñ.

2 Pahixäänäp hajxy jaduñ nämay. Ja'a häna'c-hajxy mæbahixaamb, ja'a tyijy ja'a Diosmädia'agy hajxy mæbøjpä. Coø hajxy jaduñ hoy quia'a hida'añ, ni häna'c-hajxy hõhndaacpä, ni häna'c-hajxy mæbahixpä, paadiä cu'ugä tøyhajt hajxy quia'a tsoga'añ ja'a Jesucristocøxpä.

3 Ja'a hõhndaacpähajxy, xädø'øñ hajxy piøcjuø'øwaamby. Hõhnda'agymiädia'agyhaamby mijts xyajnähixø'øwa'añ; jaduñä xädø'øñ hajxy xjia wi'i piøgaanä. Jéquiänä Dios tiägøøyy mänaandaacpä coogä häna'c-hajxy quiumädowa'añ, ja'a hõhnda'agymiädia'agy hajxy yajnähixøøbiä. Jaduñä Dios jecy miänaandaacpä cooc hajxy quihdägoyya'añ.

4 Hix, yajcumädoobiä Dios je'e pønjaty ca'a mæbøgaamb. Coø mioonsähajxy näje'e jim jecy quia'a mæbøjcy tsajpootyp, paady hajxy jecy quiumädooyy. Haxøøgtuum hajxy hoy

quihjuipnaxyii maa jiaančh tehṃ quiøøcän, maa yhagoodstuumän. Jim hajxy yhida'añ høxtä coonä yhabáadät coo Dios jaduḥṇ miäná'anät nebiaty hajxy jii jiaac tsaačhtiuna'añii.

⁵ Jaanä jaduḥṇä Dios ja'a jecyjiäya'ay yajcumädoobä, ja'a hajxy jecy tøø quia'a mäbøquiäbä. Mänitä Dios nøøgomdägoy quiejxy. Jayooyä Noéhajxy choocy møødä yhuung møødä tio'oxy ja'a näductujcpä. Jaduḥṇä Noé ja'a cu'ug hänajty tøø jia yajwiingapxø'oy coogä yhaxøøgcuhdujt hajxy ñajtshixø'øwät, coogä Dios hajxy wyiingudsähgø'øwät.

⁶ Jaanä jaduḥṇä jecyjiäya'ayhajxy jiajpä, ja'a hajxy hijty jim tsänaabiä maa cajpt hijty jaduḥṇ xiøhatiän Sodoma møødä Gomorra. Cabä Dios hajxy hijty ñä'ägä wiingudsähgø'oy. Paady hajxy jøøonhaam yajcuhdägooyä. Cøjxä haxøøghäna'c-hajxy yho'ogy. Haagä cujiaam hajxy jiajnä møødä quiajpthajxy. Hijxtahnd ja'a Dios jaduḥṇ piädaac coo haxøøgjäya'ayhajxy nägøxiä yajcumädowa'añii.

⁷⁻⁸ Mänaa Dios ja'a jecyquiajpt jaduḥṇ yajcuhdägoyyän, jagooyä tu'jäya'ay yajtsoocä, ja'a hänajty xøhajpä Lot. Paadiä Lot yajtsoocä, je'eguiøxpä coo hänajty hoy jiäya'ayhaty. Mänitä Dios ja'a Lot yhawaanä coogä quiajpt hänajty quihdägoyya'añ. Paadiä Lot jim chohñ. Jaančh tehṃ jiootmayhajpä Lot hänajty jaduḥṇ coo cu'ughajxy hänajty haxøøg jiatcø'oy jabom-jabom hijxwiinduum.

⁹ Nebiä Dios ja'a Lot jecy yajtsooquiän, jaanä jaduḥṇä Dios ja'a quiu'ug yajtso'ogaambä coo hajxy hänajty chaachpøcy. Tøyhajt jaduḥṇ. Jaanä

jaduhñ tiøyhájtäbä coo Dios yajcopcø'y nebi-
atiä haxøøgiäya'ayhajxy jiatcø'øyän. Jéquiänä
Dios jaduñ miänaañ cooc hajxy quiumädowna'añ.
Coo jaduñ yhabáadät, mäniä Dios miäna'ana'añ
nebiaty hajxy jii chaächtiuna'añii.

¹⁰ Nägø'ø nädequiä Dios yajcumädowna'añ pøn
yajnähixøøby høhnda'agyimiädia'agyhaam, pønä
Diosmäjaa xøøghajp. Jaančh tehñ chähdiuhndägoy
hajxy ñibiäda'agyii, ja'a høhnda'agyimiädia'agy
hajxy mäwädijpä. Jootmøj hajxy jaduñ
ñibiäda'agyii. Cab hajxy pøn wyiingudsähgø'øy.
Haa jaaya'ayhajxy mõjtuungmøødpä maa
Diosmädia'agy myíñänä, wiingapxpéjtäp hajxy
je'ebä.

¹¹ Haa ja'a Diosmoonsähajxy jim hijpä
tsajpootypä, maas mõcmäjaa hajxy miøødä quejee
ja'a høhnda'agyimiädia'agy hajxy mäwädijpä. Pero
cabä Diosmoonsä ja'a mõjtuungmøødpä hajxy
wyiingapxpety maa Dioswiinduumän; ni cab
hajxy ñähojy.

¹² Jaduhñä høhndaacpähajxy ñibiäda'agyii
nebiä yuughanimalän coo hajxy tii quia'a
wiinjuø'øwa'añ ja'a Dioscøxpä. Hix, cabä
yuughanimalhajxy tii wyiinjuø'øy ja'a Dioscøxpä.
Mädyiijatiä høhndaacpähajxy quia'a wiinjuøøby, je'e
hajxy ñäxiicypy. Paquiä hajxy yajcuhdägoyya'añii
nebiä animalhajxy paquiä quihdägoyyän coo
hajxy yagho'ogyii.

¹³ Tsaächtiunáañäbä høhndaacpähajxy jaduñ
je'eguiøxpä coo hajxy hñajty tøø miädsaaçhtiunñ.
Xoonäacp hajxy jaduñ coo hajxy cøxypänejpä
jiatcø'øy xøømbaady. Høxtä jiiby hajxy
yajtägø'øy maa mijts naxy mgaamiuquiän ja'a

Jesucristocøxpä. Ja'a Jesucristo miädiá'aguiäc tyijy hajxy pianøcxäp. Pero haxøøgjaty hajxy wyi'i jiatcø'øy mijts mwiinduum maa hajxy hānajtj mgaamiuquiän. Høxtä jii bypiaady hajxy je'e yhøhndaacpä.

14 Homiädyii to'oxiøjcä hajxy jaduhñ yhixy, yhadsojpy hajxy jaduhñ. Homiänaajä hajxy jaduhñ haxøøg jiatcø'øwa'añ. Wyiinhøhmby hajxy pønjetiä Diosmädia'agy hoy ca'a habøjpnä. Hadsojwiinmahñdy hajxy ñä'ägä yajtuumby. Tsipcøxp hajxy jaduhñ ñä'ägä cumädowa'añ.

15 Tøø tødiu'u hajxy jiojwa'açh. Tøø hajxy jaduhñ tiu'udägoy. Ja'a Balaam hajxy jaduhñ piahijxyp, ja'a Beor yhuung. Jeguiajtiä Balaam hānajtj quiudiuna'añ ja'a quia'awiindøguiøxpä møødä xädø'øñguiøxpä.

16 Mänitä Balaam wyiinhojnaxjä tiic jaduhñ coo jiatcø'øwa'añ. Ja'a møjc burra jaduhñ mähoj. Jaduhñ quiapxy nebiä jäya'ayän. Mänitä Balaam ñajuøøñä coo jaduhñ quia'a hoyyä. Jaduhñä burra miädia'agy miäbøjcäxä.

17 Yø'ø häna'cä høhnda'agymiädia'agy hajxy mäwädijpä, jaduhñ mäwiin hajxy miäbaady nebiä nøøjut tøø tiø'øçhpan. Jaduhñ mäwiin hajxy miäbaatpä nebiä joc piojwäditypän coo hānajtj quia'a nä'ägä tu'uy. Hix, cabä tøyhajt hajxy ñä'ä yajnahixø'øy. Cøjxta'axiøø hajxy jii by yhida'añ maa haxøøgtuumän. Ja'a Dios jaduhñ mänaañ cooc hajxy jii by yhida'añ.

18 Yoñ hajxy jia mädia'agy. Ja wi'i yajcumayaamb hajxy jaduhñ. Pero cabä miädia'agy hajxy choobaady. Ja'a høhnda'agymiädia'agyhaam hajxy wyiinhøøñ

pønjatiä Diosmädia'agy naamdägø'øy habøjp. Jøjcapxøøyyäp hajxy jaduhmbä, ween hajxy haxøøg jiatcøøguiumbä neby hajxy hijty jiatcø'øyän.

19 Jaduhnä hønndaacpähajxy yajnahixø'øy cooc tyijy quia'a nejpiä coo haxøøg mjäya'ayhädät. Hix, jaduhñ hajxy yajnahixøøbiä cooc tyijy ja'a Dios hajxy xquia'a hanéhmanä coo jecymiädia'agy hajxy ngudiúunämät, jaduhñ jia mänaambä cooc hajxy hoy njäya'ayhätämät. Jaduhñ hajxy yhønndaacpä cooc tyijy hajxy jaduhyä nnähwáatsäm. Ni je'e hajxy tøø quia'a nähwa'açh je'eguiøxpä coo yhaxøøgwiinmahñdy hajxy tøø quia'a najtshixø'øy. Paady hajxy nøcxy quiuhdägoyyaanä. Jaanä jaduhñ højtshätämbä, coo nhaxøøgwiinmahñdy hajxy nga'a najtshixøøyyämät, jaduhñ højts nøcxy nguhdägoyyáañämbä.

20 Coo Jesucristo hajxy njøjpøgøøyyäm, ja'a hajxy nWiindsønähätämbä, paadiä nhaxøøgwiinmahñdy hajxy xyajnahwáatsäm, neby hajxy yaa nmøødhätäm hädaa yaabä naaxwiin. Pero, coo Jesucristo miädia'agy mjahdiägooyyät, y coo mhaxøøgwiinmahñdy jadähooc mbadu'ubøgät, maas haxøøg jadähooc mjada'añ.

21 Hix, pønjatiä Diosmädia'agy jaduhñ jahdiägooby, maas hoy haxøpy coo hajxy cu quia'a mäbøjcy. Hix, coo hajxy jaduhñ yhøxhixät, maas hanaxiä hajxy jaduhñ quiumadowa'añ.

22 Jaduhñ hajxy jiädät nebiä hädaa mädia'agy miäna'añän: “Ja'a huc-hajxy, coo hajxy yhøøch, ja'a yhamdsoo høøch hajxy ñäwiimbijpy, nøcxy hajxy jadähooc jiøø'xø'øgy. Jaanä jaduhnä

hädsømhajxy jiatcøøbiä, naamnä hajxy hänajty tøø chi'iy, mänit hajxy jadähooc nøcxy yajtsnä tiøø'pnä mo'ondsooty." Tøyhajt jaduhñ.

3

1-2 Mägu'ughajpädøjc, miämetsc-hoocpä mijts cham nnäjaayø'øy. Jaduhñ mijts cham miämetsc-hoocpä nmägapxy nhane'emy coo mädia'agy hajxy mjahmiejtstä'agät, ja'a Diosquexypähajxy jecy quiujáhyyäbä. Jaduhñä howyiinmahñdy hajxy mmøødhädät. Huuc jahmiets hajxy jaduhmbä nebiatiä Jesucristo hajxy xmiägapx xyhanéhmäm. Jaaya'ay hajxy tøø xñähho'túütäm, paady hajxy nWiindsøn hájtäm. Ja'a Jesucristo quiugapxyhajxy, je'e mijts tøø xyhawaanä nebiatiä Jesucristo hajxy tøø xmiägapxy tøø xyhane'emy.

3 Naxy hädaa mädia'agy hajxy mdehm wyiinjuø'owät nébiøch cham nmädia'aguiän. Coo naaxwiimbä hänajty wyiimbida'añ, mänitä jäya'ayhajxy quiähxø'øga'añ coo Dios hajxy ñänøma'añ. Haxøøg hajxy jiatcø'øwa'añ nebiatiä yhamdsoo joot hajxy hänajty chocy, neby hajxy hänajty ñä'ägä cuhdujthatiän. Xñäxi'igaamb mijts jaduhñ.

4 Jaduhñ hajxy miäna'ana'añ: “Cab jaduhñ tiehm tiøjiada'añ coo Jesucristo wyiimbijtägatsa'añ neby jaduhñ tøø yhuuc mänaambä. Hix, caj tii mänaa tiägach. Je'enä cøxiä wiinä jaduhñ yhityñä mänaa naaxwiimbä jecy yhawijy tiøø'xta'aguiän, mänaa jecyjiäya'ayhajxy yho'oguiän”, nøm hajxy yhøhnda'aga'añ.

⁵ Pero tøyhajt jaduhñ coo naaxwiimbä jiaançh tågach. Pero ja'a hõhndaacpähajxy, cabä tøyhajt hajxy wyiinjuø'owa'añ. Hix, haagä nøø hijty jegyhajty. Mänitä Dios ja'a tsajt jecy yhädiuufñ møødä naaxwiin. Jiibiä naaxwiimbä yajcojy nøøjooty. Mänit hoy piäda'agy nøøhagujc.

⁶ Mänitä Dios nøøgomdägoy cujecy quiejxy. Mänitä naaxwiimbä quiuhdägöoyy. Cøjxä jäya'ayhajxy yho'ogy.

⁷ Ja'a tsajt møød hädaa yaabä naaxwiin, tøø Dios jaduhñ yajnähdiy coo quiøxy toya'añ. Mänitäc jaduhñ tioya'añ coo Dios ja'a jäya'ay yajcuhdägöyya'añ, ja'a Diosmädia'agy hajxy ca'a mäbøjpä.

⁸ Mägu'ughajpädøjc, tsøc hajxy jahmiéjtsäm coo Dios tu'xøø jaduhñ ñänømy jadu'miljomøjtpä; y jadu'miljomøjtpä, tu'xøøyyä jaduhñ ñänømy.

⁹ Näje'e jäya'ayhajxy miäna'añ cooc tyijy ja'a Jesucristo quia'a tsoj yajtøjiada'añ coo yaa quiädaactägatsa'añ, coo haxøøgjäya'ayhajxy yajcumädowa'añii. Pero cab jaduhñ tiøyyä neby hajxy jaduhñ jia wi'i yhõhnda'agy. Hix, mee'xtujpä Jesucristo ja'a mijtsøxpä. Cabä jioot chocy coo pøn quiuhdägóyyät. Jaduhñä jioot jia tsocy coo haxøøgcuhdujt hajxy nnajtshixøøyyämät.

¹⁰ Jaguiapxy yhabaada'añ coo Jesucristo yaa quiädaactägatsa'añ, coo haxøøgjäya'ayhajxy yajcumädowa'añii. Cabä pøn jaduhñ ñajuø'oy mänaa jaduhñ jiaançh habaada'añ. Mänitä tsajt quiuhdägöyya'añ. Jaduhñ yajmädowa'añ nebiä hänee møc ya'axiän. Cøxaambä xøø tioya'añ, møødä po'o, møødä madsa'a, møødä naaxwiimbä, møød tijaty yaa hijp hädaa yaabä naaxwiin.

11 Coo cøxiä wiinä jaduñ quiuhdägoyya'añ, paady hajxy tsøc hoy jäya'ayhájtäm. Tsøcxä Dios hajxy hoy wiingudsähgøøyyäm. Tsøcxä Diosmädia'agy hajxy hoy cudiúunäm.

12 Tsøc hajxy jøbhíxäm coo Jesucristo yaa quiädaactägatsa'añ. Mänitä Dios ja'a tsajt yajtoya'añ, møødä xøø, møødä po'o, møødä madsa'a, møødä naaxwiimbä. Tsøgä jäya'ayä Diosmädia'agy hajxy yajmøødmädiäacäm nämay, ween hajxy miäbøcy; jaduñä Dios paquiä yaghabáadät.

13 Tøø Dios jaduñ miäna'añ coogä hawiinjemyçhajt yhädiuna'añ, møødä hawiinjemyñaaxwiin. Jimä njoot hajxy nbädäacäm coo Dios hajxy jim xyajnøcxáanäm. Cabä haxøøgpä jaduñ jim mänaa tiägø'øwa'añ maa ja'a hawiinjemybiä tsajtän, ni jim maa hawiinjemybiä naaxwiimbän.

14 Mägu'ughajpådøjc, tøyhajt jaduñ coo Dios hajxy jim xpiäda'agáanäm, paadiä haxøøgpä hajxy tsøc najtshixøøyyäm hamuumdu'joot; jaduñä Jesucristo hajxy xpiáatämät coo pojpa cädieey hajxy hänajty nga'a møødhájtäm, coo yaa quiädaactägátsät. Tsøc hajxy jootcuyc nimioødhíjtäm nebiä tu'ugpuhya'ay nebiä tu'ugpuhdo'oxypän. Jaduñä Dios hajxy hoy xyhíxämät coo hajxy hänajty hoy ndúunäm.

15 Mjahmiédsäp hädaa mädia'agy hajxy jaduñ. Paadiä Jesucristo jaduñ miee'xtucy, weenä jäya'ayhajxy may miäbøcy, ween hajxy jaduñ may ñähwa'açh. Ja'a mägu'ughajpä Pablo, jaduñ mijts tøø xñäjaayøøbiä. Ja'a Dios ja'a tøyhajt

najtscapxøøyyä. Ja'a tsipjatypä ja'a Dios ja'a Pablo yajwiinjuøøyy. Jadúhñhøchä Pablo njuø'øy nébiøchä nhamdsoo puhya'ayän.

¹⁶ Naaghooc mijtsä Pablo xñäjaayø'øy, jaduññä'ägä mädia'agyhaty nébiøch cham njaayän. Tsipjatiä Pablo siémpräm miädia'agy. Ja'a häna'cä tøyhajt hajxy ca'a tsojpä, wiingä Pablo miädia'agy hajxy yajnähixøøyyä. Cab hajxy jaduññä'ägä yajnähixø'øy nebiä Pablo jia mänaañän. Wiingatiä Diosmädia'agy hajxy yajnähixø'øy. Cabä tøyhajt pä hajxy miäböga'añ. Paady hajxy quiuhdägoyya'añ.

¹⁷ Mägu'ughajpädøjc, mnä'ägä najuøøby hajxy jaduññä'ägä coo höñndaacpähajxy jii wiädita'añ. Cabä tøyhajt hajxy chocy. Haxøøg hajxy jiaanč tehññä'ägä jiaayä'ayhaty. Mnigwieendähadøøjäp hajxy; jaduññä'ägä tøyhajt hajxy mga'a najtshixó'øwät. Cab hajxy myajwiinhóønät coo hajxy jaduññä'ägä tu'udägóyyät.

¹⁸ Jaac habøcxä hajxy jaduññä'ägä ja'a Jesucristocøxpä, ja'a hajxy nWiindsøñhájttämbä. Jaaya'ay hajxy xñähho'túutäm. Tehññä'ägä miädia'agy hajxy mmäböjcät; jaduññä'ägä mayhajt mõj may tiúnät ja'a mijtsøxpä. Tsøc hajxy homiänaajä capxpäatäm mõj jaanč. Tsøc hajxy tehññä'ägä wiingudsähgøøyyäm. Amén.

El Nuevo Testamento en mixe de Guichicovi New Testament in Mixe, Isthmus (MX:mir:Mixe, Isthmus)

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

Copyright Information

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Isthmus

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

4e564219-157f-5807-b810-47a15308b8b8